

ALAHADY FAHA 05 MANDAVANTAONA - B



« Tompoko, mba te hahita an'i Jesoa izahay » (Jo. 12: 21)

Ry Kristianina havana, amin'izao Alahady fahadimy amin'ny karemy izao no anatanterahintsika ny pelerinajy na ny fivahiniana masina eny amin'ny 'la montagne' arakaraky ny toerana misy antsika. Fivahianiana izay entintsika mandinika bebe kokoa ny tampon'ny kalivery mba hiara-mifantsika amin'i Kristy isika mandevina ny ratsy rehetra ka hiaraka hitsangana aminy.

Vakiteny I : Jer. 31, 31-34
Tononkira : Salamo 50
Vakiteny II : Heb. 5, 7-9
Evanjely : Jo. 12, 20-33

Amin'izao taona hankalazantsika ny fanambarana olontsambatra an'i Lucien Botovasoa izao dia hiaraka aminy isika hamakivaky ny lalan'ny hazo fijaliana izay handinihantsika ny fijalian'i Kristy.

Izany hoe ny pelerinajy izay tontosaintsika androany dia iainantsika ny "lalan'ny hazo fijalian'i Lucien Botovasoa" tsy hoe hamorona isika fa ho dinihantsika ahoana ny niainan'i Lucien Botovasoa ny hazofijalian'i Kristy tamin'izy natolotra ho faty noho ny finoany an'i Kristy.

Atombontsika ety ambany izany ka faranantsika eny an-tampony kalivery.

Inona ny antony anaovantsika an'izany ?

Mba hidirantsika bebe kokoa amin'ny fiomanantsika amin'ny Paka izay fandalovana.

Miala amin'ny fiainana tsizarizary ka miditra amin'ny fiainam-baovao miaraka amin'i Kristy. Izany no tanjona tiantsika ho trararina.

Ny vakiteny telo arosan'ny Eglizy amin'izao Alahady fahadimy ny karemy izao dia mampianatra antsika ny fiombonana amin'i Kristy mijaly. Raha miara-maty aminy amin'ny fahotana isika dia miditra amin'ny fiainam-baovao miaraka aminy koa.

Tsy inona izany fa ny fidirantsika amin'ny fanekem-pihavanana vaovao amin'Andriamanitra araky ny voalazan'i Jeremia mpaminany ao amin'ny vakiteny voalohany. *“Fa izao no fanekena hataoko amin'ny taranak'i Israely, rehefa afaka izany andro izany, - teny marin'ny Tompo: - Hataoko ao anatin'ny lalàko, dia sady hosoratako ao am-pony; ka ho Andriamanitr'izy ireo Aho ary izy ireo ho oloko. ”*

Amin'izao kosa tsy fanekem-pihavanana ety ivelany fa voasoritra ao am-po izany hoe hahalala an'Andriamanitra tokoa isika ka hiombona aminy ary izany no vokatry ny fanavotan'i Kristy ka tiantsika ho trararina. Izany no fihavanana marina ka miova ny fifandraisantsika amin'Andriamanitra sy isika samy olombelona ary amin'ny zava-boahary raha miombona amin'Andriamanitra tokoa isika.

Ny fontsika no itoeran'Andriamanitra ka zanak'Andriamanitra isika. Itoeran'i Jesoa isika ka izay ataontsika dia hivelomantsika amin'ny maha-zanak'Andriamanitra antsika.

Io ilay lazain'i Md Paoly hoe tsy izaho intsony fa i Kristy no velona ato amiko.

Toy ny fifandraisan'ny ray sy zanaka ny fifandraisantsika amin'Andriamanitra sy samy olombelona ary ao anatin'ny fikolokoloana ny zava-boahary izany hoe miverina amin'ny toetra taloha tamin'ny naharian'Andriamanitra izao rehetra. Izany no maha fahariana vaovao ny Paka. Raha antombotsika amin'ny zava-boahary izany dia midika fa tsy hoe manjakazaka isika rehefa nanafatra Andriamanitra “manjaka” fa midika hoe mikolokolo sy manatsara hatrany araka ny sitrak'Andriamanitra.

Milaza amintsika i Jesoa ao amin'ny Evanjely fa raha maty ny voambary nafafy dia mahavokatra be izany hoe maty miaraka aminy amin'ny fahotana isika ka velona miaraka aminy amin'ny fitsanganany. Izany no ambaran'ny hazo fijaliana izay niainan'i Lucien Botovasoa. Mamokatra be izy satria niala amin'ny fahafatesana ka tonga amin'ny fahasambarana tanteraka.

Ambaran'ny Evanjely androany fa « tamin'izany andro izany, nisy Jentily sasany, anisan'izay niakatra hivavaka tamin'ny andro fety, nanatona an'i Filipo, izay avy tany Betsaidan'i Galilea, ka nihanta taminy nanao hoe : *“Tompoko, mba te hahita an'i Jesoa izahay”*. Dia lasa i Filipo nilaza tamin'i Andre, ka dia i Andre sy i Filipo no niara-nilaza tamin'i Jesoa » (Jo. 12: 21 – 22). Mazava ny volazan'ny Evanjely eto, naniry hahita an'i Jesoa ihany koa ny Jentily izay tonga tao Jerosalema mba hivavaka. Tsara ampahatsiahivina ihany fa ny Jentily moa dia ireo mpino hafa tsy Jody nefa tonga

manatrika sy mandray anjara amin'ny vavaka fanaon'ny Jody amin'ny andro fety. Misy amin'ny fandikan-teny sasany no tena milaza mazava fa Grika ireto Jentily naniry hahita an'i Jesoa ireto. Nandre ny zava-mahagaga maro nataon'i Jesoa izy ireo ka dia tsy nisalasala nanatona an'i Filipo ary niangavy taminy mba hihaona amin'i Jesoa.

Raha te-hahita an'i Jesoa tahaka azy ireo tokoa isika dia azo lazaina fa tanteraka ny oran'i Jesoa ao amintsika izany hoe nosokafantsika ny fontsika, nesorintsika tao ireo "encombement" maro isankarazany izay mahatonga ny Jesoa namaly an'i Filipo hoe: « *Tonga ny fotoana hanomezam-boninahitra ny Zanak'Oloha. Lazaiko marina dia marina aminareo fa raha tsy maty ny voam-bary nafafy tamin'ny tany, dia mitoetra foana izy; fa raha maty kosa izy, dia mahavokatra be* » (Jo. 12: 23 – 25a)

Ny aim-baovao amin'ny Paka no manenika ny fiainantsika manomboka amin'izao Paka izao, ka ny làlana nodiavin'i Jesoa dia ny làlana fankatoavana ny sitrak'Andriamanitra izay azahoantsika famonjena araky ny voalazan'ny mpanoratra ny taratasin'i Hebrio : "nianatra ny fanekeny izy ka tonga fototra ny famonjena mandrakizay". Manantanteraka ny sitrapon'Andriamanitra no dikan'izany.

Rehefa miala amin'ny fahafatesan'ny fahotana isika dia ny fanatanterahintsika ny sitrak'Andriamanitra no famonjena ho antsika ary dia mampiombona antsika tanteraka sy itoerantsika ao amin'i Kristy ary hitoeran'i Kristy ka hahazo ny vokatry ny tena izy dia isika zanak'Andriamanitra. Raha zanany isika dia feno hafaliana sy feno fiadanana tanteraka isika. Marina fa tsy maintsy mandalo amin'ny fihafiana, fahafoizana, fanoloran-tena amin'Andriamanitra ka rehefa manolotra ny tenantsika isika dia Andriamanitra no mitoetra ao amintsika. Raha izy no mitoetra ao amintsika dia maty ny fahotana ka mamokatra be isika ary izany no antenaintsika amin'izao Paka izao. Manantena an'izany koa isika amin'izao làlana irosoantsika lalindalina kokoa amin'ny fankalazana ny fanambarana an'i Lucien Botovasoa Olontsambatra izao, enga anie haka tahaka azy isika ka hitoetra bebe kokoa hatrany ao amin'i Kristy.

Ry Jesoa Tompo ô, zavatra ambony sady lalina ny hazo fijaliana, fanafintohinana sy hadalana ho an'ny sasany ary tsy ho takatry ny sainay na oviana na oviana ny fijaliana sy ny fanetrentenanao Zanak'Andriamanitra . Izany anefa no làlam-pamonjena manambara ny fitiavanao anay. Aoka isika Olo Araiky handray tsara ny hazo fijaliana izay notanterahintsika amin'izao pelerinajy izao izay nohalalinintsika niaraka tamin'i Lucien Botovasoa. Izy anie hanampy antsika hiombona bebe kokoa amin'i Kristy.

Ry Jesoa Tompo ô, nialoha làlana tokoa ianao nizotra nankeny amin'ny kalivery, maniry ny hiaraka aminao tokoa izahay ary nasainao aza manara-dia anao koa hazavao ary ny fo amam-panahinay, ny sainay amin'izao akaiky dia akaiky ny fankalazana ny

famonjena anay amin'izao Paka izao. Ampianaro izahay hahay hianatra ny ataonao, manana modely izahay dia i Lucien Botovasoa. Enga anie izy hivavaka ho anay ka ho vonona koa izahay hahay hanolotra tahaka azy ny fijalianay aminao ka amin'izay ho zary famonjena ho anay sy ho an'izao tontolo izao.

Tsaroanay manokana amin'izao vavaka ataonay izao ireo izay enjehina noho ny finoana, miombona amin'izy ireo izahay, herezo izy ireo hijoro hatrany amin'ny finoana. Izahay kosa hiezaka hiady amin'ireo fakam-panahy mitarika anay ho lavitra anao. Hifikitra aminao tokoa anie izahay, ianao ho ivom-piainanay ary hitoetra ao aminao izahay ary ianao hitoetra ao aminay dia hamokatra be izahay. Amen

Mompera Arseveka Mgr Benjamin Ramaroson